

HALA ERE, DATORREN URTERAKO AURREIKUSPEN ONAK DITUZTELA AITORTU DU LEHENDAKARIAK ITSASUN

Herrikoa sozietateak aurten «urte apala» izan duela dio Thikoipek

■ Iragan urteko bilan aski ezkorra egin du Herrikoa-k, kapital irriskurako sozietateak, asteburuan Itsasun egin duen biltzarrean. Galtzerik izan ez badute ere, «1993 urteko krisialditik aurtengoa urterik txarrena» izan dela esan du Jean Thikoipe lehendakariak.

Hur Gorostiaga / Itsasu



Jean Thikoipe, Herrikoa-ko presidentea.

HUR GOROSTIGA

ITSASUKO Bonnet jatetxeko gela ontsa betea zen ortzirale arratsean, urteroko biltzar nagusirako. Ekimenen bilan aberatsa egin bazuten ere, finantza aldetik «urte apala» izan dela aitortu zuen Jean Thikoipek, Herrikoa-ko lehendakariak.

Ekimenei dagokienez, Herrikoa-k 58 lanposturen sorrera lagundu du aurten. Gisa horretan, urte eta erdian zortzi enpresa ttipi berriren sortzea lagundu du, bertze bosten garatzea eta lauren indarberritzea. Alabaina, Donibane-Lohizuneko Zazpiak Bat enpresak ateak itxi behar izan ditu aurten. Orotara, 58 lanpostu sorrera eta 20 galtze: urtea 38 lanpostuko irabaziarekin bukatuko da, beraz. Gisa horretan, sortu zenetik 1.469 enplegu sortu eta iraunarazi ditu Herrikoa-k.

Finantza aldetik agertu da aurtengo puntu beltza. Christian Labatsuzanek biltzarra aitzin erran zenez, Frantziako lurraldean dagoen kapital irriskurako sozietate anonimorik handiena da Herrikoa akziodun kopuruari dagokionez, kasik 22.000 kide baitira. Baina, hala ere, oraindik ez du erdietsi dagokion lekuan egotea. Hots, gaur egun, irriskuan edo sortzeaz dauden enpresen kapitalean parte hartzen du Herrikoa-k, baina kasu gehienetan oso operazio irriskutsuak eginez. Biltzar nagusian ere puntu hori agertu zen. Enpresa batek oinarri

indartsuak dituelarik, bankuek ez dute inolako arazorik diruaren mailegatzeko. Oinarri hain sendoak ez direlarik, aldiz, bankuek irriskurik hartu ez eta enpresa horiek Herrikoa-koengana jotzen dute. Gisa horretan, gaur egun «har daitekeen irriskurik handiena» hartzen omen du Herrikoa-k. Baina helburua herrian enpleguen sortzea delarik, irriskua bigarren mailakoa da. Helburua kapitala handitzea eta aberastea

balitz, besterik litzateke, bertan agertu zenez. «Besterik da, lagundutako enpresa horiek aitzina egitean, beren irabazi guztiak atxiki nahi eta Herrikoa kapitalek kanpo ezartzen dutenean, justu operazioa Herrikoa-rentzat interesgarrien bilakatzen denean», azaldu zuen Jean Thikoipek.

Dena dela, aurtengo finantza bilana ona izan bada sozietateak zuen lokal batzuen salmentari esker izan dela azaldu zuen Thikoi-

pek, eta hala izan ez balitz galtzeak izanen zituzten, «aurtengoa 1993ko krisialditik urte txarrena izan baita». «Iaz esperantza handiarekin ginen, baina gauzak ez dira beti nahi bezala ateratzen».

Hala ere, ez dago ezkorra izateko arrazoirik, azaldu duenez. Kapital irriskurako sozietatea izanik, urte berrirako «aurreikuspen onak» dituzte, eta zoritxarrik ezean heldu den urtea baikorra izanen da Herrikoa-rendako. X

Bruselak 600 milioiko laguntza eman dio Eudeli lau proiektu aurrera ateratzeko

■ Enplegu gune berriak bultzatzeko planak jarriko ditu abian udalen elkarteak

Vasco Press / Bilbo

BRUSELA-K seiehun milioi pezetako laguntza emango dio Eudel EAEko udalen elkarteari (24 milioi libera), lau proiektu ekonomiko aurrera ateratzeko. Eudelek ere egitasmoen zati bat finantzatu beharko du. Zehazki, udalen elkarteak 57 milioi pezeta jarri beharko ditu lau egitasmoak abian jarri ahal izateko.

Eudelek Bruselan aurkeztu dituen programak enplegu gune berrien, euroaren eta ingurugiroaren kudeaketarako sistemen ingurukoak dira. Horrezaz gainera, etxeko lanak egiteko sexuen arteko berdintasuna bultzatzeko beste egitasmo bat ere abian jarriko du Eudelek, Europako Batasunak emandako diruari esker. Bitarteko gehien (laurehun milioi pezeta) Emasser izeneko programa bultzatzeko erabiliko du Eudelek, herritarrek produktu ekologikoak eros ditzaten bultzatzeko eta udaletan ingurugiro kudeaketarako zerbitzuak sustatzeko. Enplegu gune berriak sortzeko programak, Esparruk, 66 milioi pezeta izango ditu. Gipuzkoako hainbat udaletan jarriko da abian Esparru programa, eta Gipuzkoako Aldundiaren laguntza ere izango du. X

Nerbioiko Ibar Ezkerra suspertzeko plana onartu du SPRIk

Efe / Bilbo

INDUSTRIA proiektu berriak abian jar daitezen bultzatzeko plana onartu du SPRIk, Industri Sustapen eta Eraldaketarako Baltzuak. Muskizko Santelicesen industrialdean, Erandioko industria gunean eta Urtuellako Granada industrialdean SPRIk dituen lur sail batzuk salgai jarriko ditu «prezio lehiakorretan» -inguruetako lur industrialaren batez bestekoaren prezioarekin alderatuta-. Lur sail horiek eskuratu nahi dituenari laguntza bereziak emango dizkio SPRIk, Eusko Jaurilaritzaren esku dagoen baltzuak berriki onartutako planaren arabera. Laguntzak eskuratutako metro koadro kopuruaren araberrakoak izango dira.

Baliteke gerora plan berbera Ibar Ezkerreko beste herrietan ere aplikatzea. Hiru urteko iraupena izango du SPRIren planak, baina eskaera handia izanez gero luzatzea izango da. X

Zirkulazio normala Biriatuko mugan

Eusko Jaurilaritzak jaiegunetan ibiltzeko debekua kendu izanak ez ditu zirkulazio arazoak urritu Biriatuko mugan. Larunbatean eta igandean Biriatuko mugan kamioi ilara luzeak izan ziren. Espainiara edo Portugalera zihoazen kamioiak bildu ziren Hendaiaitik Donibane-Lohizuneraino, A63 autobideko muga ezin zeharkatuz. Zazpi kilometroko ilara osatu zuten larunbat gauean, eta autobideko zerbitzuek zirkulazioa desbideratu zuten RN10 hartzeko aholkua emanez. Sortutako arazo handiari buru egiteko, muga ireki zuten igande gauean goizeko 08:00ak arte, eta A63 autobideko zirkulazioa berriro normala zen atzo.

